

Općinski sud Sarajevo

Reforma zemljišne administracije uspješna

Općinski sud u Sarajevu demantirao je juče navode koje su u medijima dali predstavnici Ministarstva pravde FBiH da su zemljišne knjige neažurne, kao i sam rad općinskih sudova, prenosi Fena.

U ovom sudu tvrde da je u posljednje dvije godine urađen veliki broj neriješenih predmeta, savladan desetogodišnji zaostatak, a upis u zemljišne knjige sveden na period do 30 dana.

Do sada je više od 85 posto uložaka prebačeno u elektronski oblik (90.000 uložaka) te vlasnici nekretnina imaju mogućnost uvida u elektronsku zemljišnu knjigu, kao i u

dnevno stanje knjige putem portala www.zkk.ba, navodi se u saopćenju Općinskog suda u Sarajevu.

Ocijenjeno je da se sličnim izjavama u medijima reforma zemljišne administracije nepotrebno dovodi u pitanje.

U Općinskom sudu Sarajevo samo je 4.500 neriješenih predmeta, što pokazuje uspješno provođenje reforme.

Naglašava se da bi bilo kakva promjena zakonskih okvira u ovoj oblasti dovela u pitanje pravnu sigurnost građana-vlasnika nekretnina upisanih u više od 90.000 uložaka, navodi se u saopćenju.